

Байрта хонъх джинънв

Эн бичкдүд школд шинькән ирсн байрта өдрләнъ, арвдгч классин сургъульчнр түрүн хонъхинь джинънүлснъ—минь одахн болдж медгднә.

Сургъулин кучр-күнд арвн джилмүд ард үлдв. Элст балгъсна 1-ч номертә школин арвдгч классин сургъульчнр эндр сүүлин байрин линейкдән шинәс хурдж яралддж зогсцхав. Иим өдрмүд арвн джилин сургъуль чиләджәх көвүд-күүкдин хаалгъд негх дакдж үзгддг зөвтә мөн.

Школин сәәхн сарул классмудт, кесг дакдж багшнр сургъульчнртагъан хурдж, сүүлин байрта хонъх джинънсиг кесг дакдж сонъсдж йовсмн, тер байрт багшнр болгън шинәс аамсдж, данъгин үүмдг билә. Тернь чигн зөвтә, арвн джилин эргцд теднлә хамдан, теднә түрүднъ зовад, сәәнднъ байрлад, нег джиргъләр бәәсн багшнр болдг.

Арвн джилә сургъулән төгскдж, джиргълин хаалгъдан орджах көвүд-күүкдиг багшнрнъ, үүрмүднъ болн негдгч классд орджах сургъульчнр, сургъулин джилән шунмгъагъар чиләдж, орн-нутгтан туста, алдр үрдүднъ болтн гидж, үнн седкләсн йөрәцхәв.

—Арвн джил урд, бичдж чигн чаддго, умшдж чигн чаддго цагтан, мана школин үүд алхдж ордж ирцхәләт, ода болхла, эн арвн джилин эргцд, школ таднд ю дасхсиг үзүлх цаг ирв. Цуг багшнрин коллективин нерн деерәс шүүврән сәәнәр өгхитн эрджәнәвдн,— гидж эн школин директор А. В. Бурлакова келв.

Арвдгч „Б“ класс чиләджәх көвүд-күүкдиг түрүн дөрвн джилмүдтнъ сургъсн көгшн багш А. С. Голубева, эк-эцкнрин нерн деерәс К. Б. Косьянова, негдгч классд орджах сургъульчнр чигн, тедниг

школан тоомсртагъар чиләтн гидж ик байртагъар дуудцхав.

—Алд йовдг болвчн—төрскн школан бичә марттн,— гидж багш Голубева халурхдж келв.

Арвдгч класс чиләджәх көвүд-күүкд, багшнртан ханлт өргәд, цецгәс өгцхәв, зәрмнъ эврәннъ гарин эрдмәр кесн белгән өгцхәв.

Мана школмудар, кесг-кесгәс нааран шиньгрси авьясар, негдгч классин сургъульч арвдгч классд сүүлин, чилгч, хонъхинь джинънүлв. Арвн джилии эргцд эн хонъх джинъндж, урок эклсн болн чилсиг оньдинд медүлдг билә, ода болхла, сургъулән чиләгъәд, төрскн школарн мендләд, джиргълин хаалгъдан орджах көвүд-күүкдин сүүлин, чиләгч хонъхнъ болдж байртагъар джинънв.

СЕМЕНОВА А.